

## ❖ CAROL NADOLIG

Tôn: 'Hereford'

Mae'r clychau'n canu eto'n glir  
 Ar adeg y Nadolig;  
 Fe anwyd inni Geidwad pur,  
 Yr Iesu bendigedig.  
 Anfeidrol Dduwdod yn y cnawd,  
 Cyflawnder y cyfamod,  
 Ac yntau yn ei breseb tlawd  
 A'r wryf yn ei warchod.

Angylion ganodd neges ddrud  
 Yn dyner ar yr awel;  
 Bugeiliaid aethant at y crud  
 I blygu yno'n dawel.  
 Rhyfeddol oedd y nefol wyrth,  
 Digymar oedd eu syndod  
 I weld yr Oen a aeth yn fud  
 I'r lladdfa dros ein pechod.

Yng ngolau'r seren gyda'r hwyr  
 Daeth doethion â'u hanrhegion  
 I foli'r baban tlws a wŷr  
 Yn llwyr ein holl anghenion.  
 Doethineb Duw mewn rhychwant bach,  
 Difesur yn ei fawredd,  
 A thros ei gawell cysgod croes  
 O'r dechrau fu yn gorwedd.

Nid bellach ar ei wely gwair  
 Ond ar ei gadarn orsedd  
 Y gwelir dwyfol Faban Mair,  
 Yn haeddu pob anrhydedd.  
 Mae'r clychau'n canu eto'n glir  
 Ar adeg y Nadolig;  
 Gogoniant, clod a moliant gwir  
 I'r Iesu bendigedig.

**Pat Turner**